

Uniun Via son Giachen en il Grischun

Intent ed activitad durant 2012

■ (anr) Enschavì ha tut a ses temp suentar in viadi d'activs pelegrins ord las plaiivs da Tusaun e Masein a Santiago de Compostela en Spagna. Ils participants èn stads talmain intgantads ch'els han sin quai fundà 2004 a Tusaun ina «Uniun Via son Giachen en il Grischun».

L'intenziun primara è stada dad «avrir» ina via s. Giachen tras il Grischun e da far enconuschenta sia muntada cultural-istorica en noss dis. Quella finamira han ins gì cuntanschè tras «fixar» la Via da son Giachen davent da Müstair sur Tujetsch vi e la colliar cun la «Via Jacobi» a Seelisberg (UR). L'avertura festiva da quella via ha gì lieu il settember 2008. E dapi alur han adina

dapli pelegrins fatg adiever da quella e descrit lur experientschas ed impresiuns. – La chasa editura da la «Terra Grischuna» ha dentant edì in guid cun indicaziuns turisticas, culturalas e spiritualas davart quella via. Ins haja gia vendì blers exemplars.

L'Uniun Via s. Giachen en il Grischun vegn presidiada da *Rudolf Trepp*, Masein. Mainfatschenta è ser *Heiner Nidecker*, Tusaun, fertant che *Sonja Weichelt*, Ziràn, redegia il feagl da comunicaziun «Via son Giachen». L'uniun ha radund 80 commembers (singuls e collectivs).

En plirs lieus – oravant tut en Surselva – han ins piazzà sper la Via s. Giachen

conchiglias, il simbol da quel songt. Quellas vegnan mintgamai regaladas. Per pudair metter talas conchiglias sper via er en Val Müstair, Engiadina, Tavau e Scanvetg tschertgan ins anc sponsurs.

Gronda paisa vegn dà proximamain al project «Scuvrì son Giachen». I sa tracta da carnets accompagnants sin la via da pelegrinadi tras il Grischun. En nov vischnancas vulan ins metter talas infurmaziuns a disposiziun. Ina colliaziun da la Via s. Giachen – davent da Müstair vers il Vnuost – è planisada. – Detg activa è era l'uniun tetgala Via s. Giachen svizra stada l'onn passà. – Proximamain salva l'Uniun via s. Giachen grischuna sia radunonza generala a Cuir.